

身。吾妻欲啼刃在頸，但指鄰戶尸橫陳。全家落賊羊待宰，全村指我狗可醢。悠悠此恨訴與誰，高高者天滔滔海。嗚呼！平時見慣枯魚泣，身作枯魚有今日。

西行雜詩 六月二十日始

李仙棧

襪被賦西征，間關萬里行。偷生心自傲，惜別意非輕。秋黯嶺頭暝，潮翻珠海腥。無知小兒女，苦苦問歸程。

大事未云去，身殲正此時。心肝當已奉，指臂復何疑。世亟紛妖鳥，途牽見木龜。杜陵憂國意，諸將若爲辭。

焦土敢非議，棄防寧忍聞。疚心剛去郡，淚眼怕逢人。盡職憐羣季，危城念老親。降殃何太酷，我欲叩蒼旻！

幕地驚凶耗，將疑復似真。萬方同憤慨，一省又沉淪。黎首果何罪？

天心信不仁。石羊飛夢迴，熱淚已沾巾。（到海防）

太息珠崖棄，於今未百年。滄桑真屢見，風俗尚依然。顧影有微喟，
聞聲但可憐。因循全盛日，大計失籌邊。（到安南古郡）

古號天南國，今餘正北門。彈丸猶割據，殘緒復相吞。稗子昔能武，
將軍每負恩。興亡如有數，應起白雲言。

明都一勺水，猶是洱川餘。寂寞宗臣塚，喧囂童子居。有圈馴豕鹿，
沒字記蟲魚。衰柳斜陽下，雙雙閒鬥車。（越南作二首）

到耳是鄉音，喧呼入國門。關山猶壯麗，天地久塵昏。改命思前烈，
承基愧後昆。金甌悲已缺，到處有啼痕。（海防到河口）

革命參初地，艱難念本師。黑旂今已遠，漢界早輕移。行路偏多感，
看山指後期。救鄉徒有願，前席記陳詞。（過海口）

六詔我初來，昆陽問劫灰。身隨車共轉，腸與路交迴。赴難心仍切，思鄉淚易催。大明亡國處，登覽不勝哀。（到昆明）

莫笑腐儒酸，今來試與看。青雲原易上，蜀道未云難。掬手天一握，

回頭路萬盤。凌空好舒嘯，境界自然寬。（乘機至渝）

巴子舊稱國，共和權作都。山川原險要，薪膽亦良圖。勇愛將軍節，

清標貞婦廬。峽前明月色，千古照名區！（到重慶）

寶章閣遠眺

許崇灝

戰雲橫斷一天秋，破碎山河入倚樓。拍遍欄干人不識，夕陽影裏看吳鉤。

古戍斜陽照戰旗，西風涼露溼征衣。十年辜負橫磨劍，又是秋高馬正

肥。